



Allakkiaq

Uunga

Naalakkersuisut

11-09-2024
Suliap nr.: 2023 - 16877
ID nr.: 93948723

'Ataatsimoorluta inissiat peqqissuutitsigit' – Namminersorlutik Oqartussat inissianik attartortittagaanik iluarseeqinneq

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Allakkiaq manna Ineqarnermut Attaveqaasersuutinullu Naalakkersuisoqarfimmit suliarineqarpoq. Allakkiami Namminersorlutik Oqartussat inissiaataanni iluarsaassinermit suliaqarnissaq 'Ataatsimoorluta inissiat peqqissuutitsigit' nassuiarneqarpoq.

Namminersorlutik Oqartussat inissiaataanni aserfallatsaaliuinermit pisariaqartitsineq annertusiartorsimasoq ataatsimoortoq 2022-mi 2,5 mia. koruunit missaannut naatsorsorneqarpoq. Namminersorlutik Oqartussat inissiaataasa qanoq issusaannik nalilersuinerup takutippaa illoqarfinni tamaginni aserfallatsaaliuisoqarsimangitsoq. Aserfallatsaaliuineq annertusiartorsimasoq aammalu aningaasartuutissat tassunga atasut, aserfallatsaaliuinissamik pisariaqartitsinerup annertusiartuinnarnerani ajoqusernerillu amerliartuinnarnerat ilutigalugit ukiut tamaasa annertusiartuinnarput. Iliuseqartoqanngippat aammalu ineriartorneq mumisinneqanngippat, pissutsit ajorneruliinnartussaapput.

Inuiaqatigiinni annertuunik nalillit pisortat inissiaataanni pituttorsimapput, taamaattumillu inissiaatit aserfallatsaaliornissaannik qulakkeerinissaq aningaasaqarnikkut pingaaruteqartorujussuuvoq. Tassunga ilanngullugu aserfallatsaaliuisannginneq peqqinnissamut aarlerinartorsiornermik inissiaatillu nukinginnartunik ajoqusernarnerannik, malitseqartarpoq. Kingulliullugu taaneqartoq iluarsaassinissamut inoqanngitsunilu aningaasartuuteqarnerulersitsisarpoq, tassami ajoqusernerit iluarsaanissanut aningaasartuuteqarnerulernernik inissiallu arlallit najorneqarsinnaajunnaarnerannik malitseqartarmata.

Najugaqarfiit missingersuutaannik misissuinerit takutippaat, najugaqarfinni ineqarnermut akiliutinit isertitat ingerlatsinermit aserfallatsaaliuinernullu aningaasartuutitut matussutaasinnaangitsut. *Pilersaarutaasumik Piffissakkaartumik Aserfallatsaaliuinermit (PPV)* ukiumut katillugit 35 mio. koruunit immikkoortinneqartarput. Taakkua ukiumut 150 mio. koruunit pissusiviusuni pisariaqartinneqartut 20 %-iisa missaannik annertussuseqarput. Tassunga ilanngutissaq najugaqarfiit ingerlatsineranni 5 mio. koruunit missaannik ukiumut ataatsimut katillugu amigartooruteqartarnerat. Ukiorpassuarni aningaasalersuisimanginneq aammalu PPV-imik pingaartitsisimanginneq piffissap ingerlanerani aserfallatsaaliuinermit pisariaqartitsinerup annertusiartuinnarneranik kinguneqarsimapput.

Iluarsaassinissamut suliniuteqarneq

Iluarsaassinermik suliniuteqarnissami tamarmiusumi ilusiliaq immikkoortunut agguagaasoq aallaavigineqarpoq, tassani atuutsitsilernissamut pilersaarut iluarsaassinissamut suliniuteqarnerup immikkoortuanik siullermik, immikkoortut aappaannut pingajuannullu kinguneqartussamik, imaqarluni:

Immikkoortoq 1 - Aserfallatsaaliuinnginnerup annertusiartuinnarnera aammalu malittaasuinik ajoqusiinerit ineriartoqqiinnarnissaat unitsillik

- Illuutit sannaannik iluarseeqqinnissaq isumannaallisaanermut imaluunniit peqqinnissamut aarlerinartorsortitsisoq (suliassat nukinginnartut)
- Atorsinnaajunnaalivinneranni, akitsorsaataasumik malittaasuinik ajoqusernernik peqqinnissamullu aarlerinartorsortitsinernik malitseqartunik, illuutit sannaannik iluarsaassineq taasersuinerlu (2,5- 4 akornanni qanoq issusaat isikkoqartut)

Immikkoortoq 2 – Ajorsiatornera unitsinneqarpoq aammalu aserfallatsaaliuineq annertusiartortussaq annertusiartorunnaarpoq

Immikkoortoq 3 – Aserfallatsaaliuisannginneq annikillisinneqarpoq/peerneqarpoq aammalu PPV oqimaaqatigiissoq piujuartussarlu anguneqarpoq, tassani ukiumoortumik aserfallatsaaliuisarneq pisariaqartitsinermik illuatungilerneqarluni.

Iluarsaassinissamut suliniuteqarneq - neqeroortitsineq

Pilersaarummi suliassat ataasiakkaat, kiisalu taakkua kingusinnerusukku neqeroortitsinermut atatillugu inaarutaasumik ilusilersorneqarnerat, inuussutissarsiortuni najukkani pissutsinut naleqqussarneqassapput. Pisariaqartitsineq pisinnaasallu aallaavigalugit nunarput tamakkerlugu agguarlugu, suliassat inoqarfinnut tamaginnut agguarneqarnissaat aallaavigineqarpoq. Tassunga ilanngullugu piffissap sivisunerusup ingerlanerani suliassanik neqeroortitsinermi ataatsimoortukkaanut annertunerusunut neqeroortitsisoqartassaaq, inuussutissarsiortut suliaqarnissaminnut aningaasaliinissaminnullu pilersaarusiornissaannut pitsaanerusunik tunngavissaqartinneqassallutik, kiisalu atortussani sulisussanilu aningaasaliinissamut kajumissaaruteqassallutik. Peqatigisaanik suliffeqarfiit amerlanerusut amerlanerusunik ilinniartoqalersinnaanermut, taamaalillunilu illulioortiternermi sanaartornermilu inuussutissarsiortuni pisinnaasanik annertusiartuaartitsinissamut periarfissaqalernerannut, tamanna iluaqutaassasoq naatsorsuutigineqarpoq. Neqeroortitsinerit qanoq aaqqissuunneqarpata, anguniakkat ilaat pingaarutalik taanna qanoq siuarsarneqarsinnaanersoq, misissorneqassaaq.

Inissiat piffissami atorineqarfissaannik sivitsuinissaq siunertaralugu suliassat tassaanerussapput nalinginnaasumik suliassat annikinnerusut, akuttunngitsumik akuttussusilimmik neqeroortitsivigineqarsinnaasussat. Suliassanut taakkununga assigiissaartumik neqeroortitsineq, suliassap annertussusaanut sularineqarnissaanullu naatsumik erseqqissumillu nassuiaammik imaqartoq, sularineqassaaq. Suliassat taakkua tassaanerussapput suliassanut immikkuullarissunut tunngassutillit, taamaaliornermi entreprenørit minnerusut suliassaq sularisinnaassallugu. Entreprenørit pilerilersinnaanissaannut suliassat ataatsimoortukkaani katersorneqassapput. Sularinninnissamut piffissamut pilersaarummi sumiiffinni pisinnaasat sapinngisamik annertunerpaamik aallaavigineqassapput.

Suliassat annertunerusut pisariunerusullu aallaaviatigut ingerlatassanut neqeroortitsinertut neqeroortitsivigineqartassapput. Ingerlatassanut neqeroortitsinermi angusassanut piumasaaqartoqartassaaq, tassalu illup ilaa naammassineqartoq qanoq pisinnaanissamik naammassinniffiussanersoq. Taamaaliornikkut suliassap sularinissaanut akisussaaffiup ilaa

entreprenørimumut nuutinneqartassaaq, taamaaliornermi entreprenørrip ilisimasai, misilittagai aammalu sanaartornermini atortussai annertunerusumik suliassamik sularinninnissami ilaatinneqarsinnaassallutik.

INI A/S ukiumoortumik najugaqarfii PPV-imumit aningaasassat illuartitai atorlugit suliassarpassuarnik suliqartarpoq. Siunnersuutigineqarpoq aningaasassat taakkua atuutsitsilernissamut pilersaarutip aningaasalersorneqarnerani ilanngunneqassasut, taamaalillunilu taakkua taanna naapertorlugu atugassanngortinneqartassasut. Iluarsaassinissamut suliniutissat INI A/S-ip ullumikkut ingerlattagai, Namminersorlutik Oqartussat inissiaataanni iluarseeqqinnissaq aammalu aserfallatsaaliuisannginnerup annertusiartuinnarnerata unitsinnissaa pillugu anguniagaqarnermut tunngavissiiingissinnaapput, tassami aningaasassat pisariaqartitsiviunerpaani aammalu aningaasat iluaqusiinerpaaffissaanni atorneqartussat pingaarnersiuiernermi tamatigut salliutitsiviusanngimmata.

Najugaqarfii PPV-imi aningaasassat illuartitaasa iluarsaassinissamut aningaasassani tamarmiusuni ilanngunneqarneranni, aningaasassat suut iluaqusiinerpaassanerannut tunngatillugu pingaarnersiuiernermi salliutitsiviunissaat qulakkeerneqassaaq, kiisalu ajorsiaruinnartut unitsinnissaannut iluaqutaassalluni aamma aserfallatsaaliuisannginnerup annertusiartuinnarnera unitsinneqassalluni. Aningaasassat ataatsimoortinneqarpata, taamaalilluni atuutsitsilernissamut pilersaarummut aningaasassat amerlanerusut atorneqarsinnaalissapput aammalu kissaatigineqartumik sunneeqatigiissitsinissaq ajornarunnaarsinneqassalluni.

Iluarsaassinissamut suliniuteqarnissamut akisussaaffik tamarmiusoq Iluarsaassinernut allattoqarfimmi, illuutunut ilisimannittumi aammalu iluarsaassinernik suliqarnernik annertunerusunik ingerlatsisarnermik misilittagaqarnerpaasumi, inissinneqassaaq. INI A/S-ip piginnaasaqarfimmi qitiusuni allaffissorneq ukatarissavaa aammalu najukkani ilisimanninnerminik tapersiissalluni, najugaqartunut attaveqassalluni kiisalu aserfallatsaaliuineramik suliassat annikinnerusut, innuttaasut angerlarsimaffiit isernissamik pisariaqartitsiviusut, akisussaaffigissallugit. Taamaaliornikkut INI A/S-imi teknikkikkut sulisut piginnaasaqarfii suli atorluarneqaannassapput. INI A/S-ip iluarsaassinernik aserfallatsaaliuinermillu suliassat ingerlanneqarnerisa ilutigisaanik IPV-ip nutarterneqarnera ingerlatissavaa.

1. Immikkoortoq – Atuutsitsilernissamut pilersaarut

Ineqarnermut Attaveqaasersuutinullu Naalakkersuisoqarfik iluarsaassinissamut suliniuteqarnissamut pilersaarummik, Namminersorlutik Oqartussat inissiaataanni ukiuni 20-ni tulluutuni iluarsaassinernik suliqarnissamik aalajangersaaviumik, suliqarpoq. Pilersaarut Iluarsaassinernut allattoqarfiup inissiani ataasiakkaani paasisimasaqarnera, kiisalu *Paasissutissanut Pilersaarusiornermullu Sakkussami* (IPV) Namminersorlutik Oqartussat inissiaataasa qanoq issusaannik nalilersuinermi siusinnerusukkut ingerlanneqartumi paasissutissat nalunaarsukkat, tunngavigalugit sularineqarpoq, tassani atuutsitsilernissamut pilersaarut qarasaasiatigut paasissutissaasivimmi immikkoortumi ilanngunneqarluni. Tamatumani pilersaarutip ingerlaavartumik nutarterneqartarsinnaanissaa ajornarunnaarsinneqarpoq, kiisalu iluarsaassinissamut suliniuteqarnermi siumut alloriarnerit pillugit nalunaarusiornermut atorneqassalluni, takuuk *konto pingaarnermut 20.11.51 Aaqqissuusseqinnerit sunniutaat*, oqaasertaliussaq nr. 3.

Inuussutissarsiortuni pisinnaasat killeqarnerat pissutaalluni inissiaatit tamarmik ataatsikkut iluarseeqqinneqarsinnaanngillat. Taamaattumik iluarsaassinernik suliassanik sakkortuumik pingaarnersiuiinissaq pisariaqarpoq.

Taamaattumik atuutsitsilernissamat pilersaarummi makkua eqqarsaatigineqarput:

- nutaanik illuliortiternernut, taartissanik illuliortiternernut kiisalu suliaasanut nukinginnartunut pisinnaasanik pisariaqartitsineq,
- sanaartugassanut annertunerusunut allanut pisinnaasassat,
- suliaassarfinnut allanut pisinnaasanik pisariaqartitsineq, ilanngullugu Namminersorlutik Oqartussat illuutaanni allani aserfallatsaaliuisimannngissinnaaneq, aamma
- kommunini namminersortunilu suliaassat.

Atuutsitsilernissamat pilersaarummut anguniagarineqarpoq ungasissumut aammalu piviusorsiorlumik pilersaarummik, iluarsaassinissamat suliniutissanut piviusorsiorlumik siunnersuuteqarfiusumik, aserfallatsaaliuisimannnginnerup annertusiartuinerneranik unikaallatsisisinnaasumik unitsitsisinnaasumillu, aammalu siunissami aserfallatsaaliuinissamat pisariaqartitsinerup angummaffigineqarsinnaanerannik kinguneqartussamik, suliaqarnissaq.

Suliaassat ukiumiit ukiumut pilersaarummi allassimasut annertussusaanni, najukkani pisinnaasat pisariaqartitsinerillu naatsorsuutigineqartut aallaavigineqarput. Ukiut tamaasa suliaasanut nukinginnartunut, kiisalu nutaanik illuliornissamat taartissanillu illuliornissamat pisinnaasanik atugassaqartassaaq.

Pilersaarutip ineriartortuunissaa, pilersaarutip nalorninartortaasunit sunnersimaneqarnissaata pinngitsoorneqarsinnaannginnera aallaavigalugu, pisariaqarpoq, tassami ilisimasat maannakkorpiaq inissiat, inissianik pisariaqartitsineq aammalu illuliortiternermi sanaartornermilu inuussutissarsiorluni pisinnaasaqarnerit pillugit ilisimaneqartut aallaavigalugit ungasissumut piviusorsiorlumillu iluarsaassinermik suliniuteqarnissamat pitsaanerpaamik siunnersuuteqarnek tassani pineqarmat. Taamaattumik suliniuteqarnerup piviusunngortinneqarnera imaluunniit pissusiviusut allanngortarnerat ilutigalugit, pilersaarut ingerlaavartumik nutarterneqartartussaassaaq. Tamanna tassaasinnaavoq nunassittarnerup ilusaani allanngortoqarnerata, politikkikkut pingaarnersiunerit, aningaasassat pissarsiarineqarsinnaasut aammalu inuussutissarsiorluni pisinnaasaqarnerit imaluunniit malittaasunik ajoqusernerit aserfallatsaaliuinissamullu pisariaqartitsinerup ilimagineqartunit sukkanerumik ineriartornerisa, malitsigisaanik inissianik pisariaqartitsinerup allanngornera. Pisariaqartitsisoqalissagaluarpat, pilersaarummi suliniuteqarnissaq annertusitinneqarsinnaassaaq imaluunniit annikillisinneqarsinnaassalluni.

Pingaarnersiunerimi tunngaviusut – atuutsitsilernissamat pilersaarut

Qanoq issutsini ilisarnaatit makkua IPV-imi takuneqarsinnaapput:

- 1,0 Illup sannai nutaatut isikkoqarput
- 1,5 Illup sannai nutarpassittutut isikkoqarput
- 2,0 Nungullalaarsimavoq, taamaattoq siunertaq malillugu atorsinnaalluni
- 2,5 Nungullarsimavoq, kisianni ajoqusersimanani - siunertaq malillugu atorsinnaavoq
- 3,0 Nungullarsimasorujussuovoq, ajoqusernerit amigaatillu aallartilersimapput
- 3,5 Ajoqusernerit amigaatillu arlaqarput
- 4,0 Ilai atorsinnaanngillat. Illup sannai iluarseqqinneqartussaapput imaluunniit taarsersorneqartussaallutik, kisianni navianaateqaratik
- 4,5 Atorsinnaanngitsut amerlapput. Illup sannai iluarseqqinneqartussaapput imaluunniit taarsersorneqartussaallutik, kisianni suli navianaratik
- 5,0 Atorsinnaanngitsut amerlapput aammalu isumannaallisaaneq peqqinnissarlu navianartorsiorsinnaapput

Atuutsitsilernissamat pilersaarummut aallaavigineqarpoq piffissamik atorneqarfissaannik sivitsuinissaq aammalu illup sannaannik 2,5 aamma 4 akornanni qanoq issusaat ilisarnaateqartunik iluarseeqqinnissaq. Illup sannai taakkua aserfallatsaaliorneqarsimangitsutut kiisalu navianaateqaratik aammalu annertuunik ajoqusinnginneranni taarsersorneqarsinnaallutik, qanoq issuseqartutut, nalilerneqarput. Illut sannaasa ilai, atuutsitsilernissamat pilersaarummi taarsersorneqarnissaannik pilersaaruteqarneq sioqqullugu ajoquseresimallutik imaluunniit ajoquserussaallutik, qanoq issuseqartussaapput. Suliassat taakkua nukinginnartunut suliniuteqarnermi iliuuseqarfigineqassapput, aningaasartuuteqarnerulersinnaanermut aningaasalersuinissamat pilersaarummi aningaasassanik immikkoortitsisoqassalluni.

Illut sannai 2,5-imit annikinnerusumik qanoq issuseqartut, aserfallatsaaliuisoqarsimangitsutut naliliisoqarani, qanoq issuseqarput. Illut sannai 4 sinnerlugu qanoq issuseqartut, annertuunik ajoqusersimallutik, taamaattumillu annertuumik nukinginnartumik suliniuteqartoqartussaalluni, imaluunniit inissiani ataatsimut katillugit qanoq issusaat 4 sinnerlugu qanoq issuseqartuni ilaallutik, taamaattumillu isaterneqartussatut aalajangiunneqarsimallutik, qanoq issuseqartutut nalilerneqarlutik.

Illut sannaannik iluarseeqqinnani piffissamik atorneqarfissaannik sivitsuinissaq, aserfallatsaaliuisimanginnerup annertusiartornissaa unikaallatsinniarlugu, taamaalillunilu kingusinnerusukkut iluarseeqqinnissap ukkatarisinnaanissaanut piffissaqalersitsiniarluni, atuutsitsilernissamat pilersaarummi piffissami siullermi pingaarnersiunerme salliutinneqarpoq. Piffissamik atorneqarfissaannik sivitsuineq tassatinneqarpoq iluarsaassinerit annikinnerusut imaluunniit suliniutissat allat, illup sannaannik pineqartunik taarsersuinissamik imaluunniit annertunerusunik iluarsaassinissamik pisariaqartitsinermik kinguartitsinnaasut. Suliniutissat annikinnerusut tassani pineqarmata, illut sannai arlallit illup sannaannik iluarseeqqinnerup taarsersuinerullu akeqqataanut, piffissamik atorneqarfissaannik sivitsuiffigineqarsinnaassapput. Piffissamik atorneqarfissaannik sivitsuinerup ingiaqatigisaanik aamma aserfallatsaaliuisimanginnerup siunissamat taamaallaat kinguartinneqannginnissaanut, illut sannai pisariaqartitsinerpaat iluarseeqqinneqartassapput.

Aserfallatsaaliuisimanginnerup annertussusaa pissutigalugu iluarsaassinermik suliassat tungaviusut makkua aallaavigalugit pingaarnersiorneqarput:

- *Imeq peertiguk.* Imeq ajoqusiisartuuvoq malittaasumik ajoqusiinerpaasarluni. Taamaattumik illup sannai erngup isaanissaannik pinngitsoortitsisussat imaluunniit imermik ajoqusernissamat periarfissaqartunut attuumassuteqartut pingaarnersiunerme siullinneqassapput. Taamaattumik illut sannai taakkua aserfallatsaaliuinnginnerup annertusiartornerata unitsinnissaanut pingaaruteqarnerpaasutut nalilerneqarput.
 - Pingaarnertigut illup sannai makkua pineqarput: illup qaava, uffarfiit, kannerit, illup saqqai, igalaat, ikkussuinerit kiisalu silaannarissarfiit/milluaasut.
 - Tassunga atatillugu illup sannai, erngup isaaneranut atatillugu malittaasumik ajoqusersimasut sunniuteqarnerpaasarnerat, aallaavigalugu pingaarnersiuisoqassaaq.
- Illut sannai nunami sumiiffik kiisalu illup sannaata inissisimaffia aallaavigalugit pingaarnersiuisoqassaaq, tassami nunatta annertussusaa pissutigalugu nunami sumiiffiit annertoorujussuummata aammalu silap pissusaa assigiinngissuteqartorujussuulluni. Taamaattumik illut sannai sorliit malittaasunik ajoqusernerpaasarnersut, kiisalu illup sannai sorliit iluarsaanneqarnissamik pisariaqartitsinerpaajunersut, illoqarfimmiit illoqarfimmut assigiinngitsuusussaavoq.
 - Illut sannai, nunami sumiiffimmit inissisimaffimmillu sunnerneqartartut tassaapput illup saqqai igalaallu.

Iluarsaassinissamut suliniuteqarnerup immikkoortuani siullermi iluarsaassinissamut suliniuteqarnerup aallartinneqarnera piffissami sivisuumi ingerlasussaavoq, kisianni aserfallatsaaliuisimanginnerup annertusiartuinnarfiini aammalu malittaasunik ajoqusernerit ingerlaannartussaaffiini pissalluni. Tamatumunnga pissutaavoq illut sannaani 3,5-imi imaluunniit annertunerusuni qanoq issuseqartuni, ajoqusernerit, amigaateqarnerit atorsinnaajunnaarnerillu aallartissimasarnerat. Tassunga ilanngullugu iluarsaassinermi suliassanik pingaarnersiunerup kingunerisaanik piffissami sivisunerusumi illut sannaanni aserfallatsaaliorneqartariaqartunik iluarseqqinneqartariaqartunillu peqartussaavoq, atuutsitsilernissamut pilersaarummi ilaatinneqartussaangitsunik.

Tassani pineqarput illut sannai, annertoorsuarnik malittaasunik ajoqusernerit tunngassuteqanngitsut, taamaattumillu aserfallatsaaliuisimanginnermi aningaasartuuteqarnerulerfiusussaangitsut. Taamaattumik illut sannai taakkua, nukinginnartumik iluarsineqarnissamik pisariaqartitsisoqarluni ajoqusernerit annertussuseqalerpata imaluunniit iluarsaassinissamut suliniuteqarnermi immikkoortoq 2-p aallartinnissaanut atatillugu aatsaat iliuuseqarfingeqassapput. Tamatuma kingunerisaanik najugaqartut ataasiakkaat inissiat iluanni nungullarsimasut iluarsineqanngitsut misigisassavaat. INI A/S-imut attaveqatigiinnermut periusissamik suliaqartoqassaaq.

Tunngavigisat aamma nalorninartortaasut

Aserfallatsaaliuisimanginnerup annertusiartornerata unitsinnissaanut, siunissamilu annikilliarortinnissaanut tunngavigineqarpoq, iluarsaassinermik suliassanik pingaarnersiuneq aammalu suliniutissat piffissamik atuuffissaannik sivitsuiffiusussat siunertarineqartut atorsinnaanissaat aamma inuussutissarsiortuni pisinnaasat annertusitinnissaanut allatigut aaqqissusseqqinnermi suliniutissat aallartinneqarnissaat atorsinnaanissaallu. Kingulliullugu taaneqartumut immikkoortumik pilersaarummik suliaqartoqassaaq, tassunga tunngatillugu ataqatigiissaarisoqassalluni.

Atuutsitsilernissamut pilersaarummi tunngavissaatinneqarpoq, iluarsaassinermik suliassat piffissamik atorneqarfissaannik sivitsuinerimik suliaqarnikkut, kinguartissinnaanissaat. Tamatumani siunertaavoq, illut sannaasa iluarseqqinneqannginneranni annertuunik malittaasunik ajoqusernerit pisoqalinnginnissaanik qulakkeerinnissaq. Tassunga ilanngullugu atuutsitsilernissamut pilersaarummi aamma iluarsaassinissamut suliniuteqarnerup immikkoortuata aappaani suliassat ukiumut suliarineqartartussat amerlisinneqarnissaat ilanngunneqarpoq, tamatumani inuussutissarsiortuni pisinnaasaqarnerit annertusitinneqarnissaat pisariaqarpoq.

2. immikkoortoq

Iluarsaassinissamut suliniuteqarnermut immikkoortoq 2 tassaavoq ajorsiaruinnarnerup unitsinneqarnera; aserfallatsaaliuinissaq annertusiartorsimasoq annertusiartoqqissanngilaq aammalu annikilliarortinneqalersimassalluni. Illut sannaasa sinneri, atuutsitsilernissamut pilersaarummi ilaatinneqanngitsut, immikkoortumi tassani ilaatinneqarput. Illut sannai atuutsitsilernissamut pilersaarummi ilaatinneqanngitsut immikkoortumi tassani suli aserfallatsaaliorneqassapput iluarseqqinneqassallutillu. Taamaaliornermi illut sannai tamarmik immikkoortumi tassani aserfallatsaaliuinermi iluarseeqqinnissamillu suliaqarnermi ilaatinneqassapput. Naatsorsuutigineqarpoq immikkoortoq taanna piffissap ukiunik 10-nik sivissusullip iluani aallartinneqarsinnaassasoq, tassami piffissami tassani immikkoortoq 1-imiit pisinnaasanik naammattunik atorneqarsinnaangortitsisoqarsimassammat.